

ČTEJENJA
I
EVANGELIUMI

NA VSE NEDĚLJE I SVETKE ČĚLOGA LĚTA

ZA POTREBUVANJE

NADBIŠKUPIJE ZAGREBEČKE,

s zavjetkom

obćinskih molitvah, po kojeh sveta Cirkva nas vući,
kaj navlastito od Boga prositi, i kaj činiti moramo,
skupa s pridavkom juternjih, mešneh. spovedneh i
ostaleh molitvah



UZORITOGA I PREČASTNOGA GOSPODINA

KARDINALA

JURAJA HAULIKA,

SEDEMDESET I OSMOGA BIŠKUPA

a pervoga

NAD-BISKUPA ZAGREBEČKOGA.

Vu Zagrebu 1858.

Berzotiskom Dra. Ljudvita Gaja.

DR. ZVONIMIR KUREČIĆ

**KAJKAVSKA
VEČERNICA
I MEŠA**

VU SV. IVANU ZELINI, 2012.

Mala biblioteka

»Dragutin Domjanić«

knjiga 51.

- *pretisak s ažuriranim sudionicima programa te mjestom i vremenom događanja*

Nakladnik

Pučko otvoreno učilište Sv. Ivan Zelina

Za nakladnika

Ivica Kukovačec, dipl.ing.el.

Urednik

Dr. sc. Zvonimir Kurečić

Grafičko-tehnička priprema

POU Sv. Ivan Zelina

Tiskano u 200 primjeraka

Tisak i uvez: Tiskara Zelina d.d.

**CIP zapis dostupan u računalnom katalogu Nacionalne i
sveučilišne knjižnice u Zagrebu pod brojem 668627**

ISBN 978-953-6540-38-9

VEČERNICA I MEŠA

POLEG STARE NAVADE SLAVNE
NADBIŠKUPIJE ZAGREBEČKE
VU STAREM HORVATSKEM KAJKAVSKEM JEZIKU
ZNOVIČ SPRAVLJENA
PO MEŠNIKU DR. ZVONIMIRU KUREČIĆU
PREBENDARU PRVOSTOLNE CIRKVE ZAGREBEČKE
VU ZAGREBU 2012.

DEVETNICA DUHU SVETOMU

Proštenjarska cirkva svetih Treh Kraljuv v Kominu
vu fari Veliki Bisag
četrtak, 24. majuša 2012. v 18.00 vur

Glavni mešnik:

dr. Zvonimir Kurečić

prebendar prvostolne cirkve zagrebečke i grkokatolički arhimandrit
marčanski

Sumešniki:

preč. **Maksimilijan Herceg**,
plebanuš bisaški i podjašpišt zelinski

Popevaju:

Časne sestre Družbe Kćeri Božje ljubavi z Zagreba:

s. Paula Borščak
s. Marjana Koščak
s. Marija Beroš
s. Ivana Margarin
s. Patricija Mikić

VEČERNICA ILI SVETLOSPEV

❖ Vu ime Otca i Sina i Duha Svetoga.
- Amen.

Mešnik podižući svieču popeva:
Svetlost Kristušuva.
- Bogu hvala.

Dok se vužižeju svieče na oltaru, popeva se: Psalm 42 (43), 3-5

Pošlji tvoju svetlost i istinu, da me peljaju, *
i dopeljaju na tvoju svetu goru, i vu tvoje prebivališče.

Stupil budem k Božjemu oltaru, *
pred Boga koji razveseljuje moju mladost.

Tebe o Bože, Bog moj, budem hvalil s citrami. *
zakaj jesi žalosna moja duša i zakaj mene mutiš?

Ufaj se vu Boga, ar ga jošče budem hvalil; *
moja pomoč, moj Bog je on.

Dika budi Bogu Otcu i Sinu *
i Duhu Svetomu.

Kak je bila na početku, tak i vezda i vsigdar,*
i na vieke viekov. Amen.

Molimo!

Vzemi od nas, prosimo te, Gospone,
vse naše krivičnosti,
da budemo vriedni stupiti
s čistim srcem pred tvoju nazočnost.
Zmožni i odičeni Bože,
i Gospon naš Jezuš Kristuš!
Rasvieti, prosimo te,
kmicu naše pameti,
podieli nam pravu veru,
stalno ufanje i zveršenu ljubav;
včini da spoznamo Tebe Gospona,
tak da mi vsigdar
vse poleg tvoje svete volje izvršimo.
Po Jezušu Kristušu našem Gosponu. - Amen.

PESMA TROJAČKA DUHU SVETOMU

Dojdi k nam, o Bog Duh Sveti,
Rieč Božju nam daj razmeti:
Dej stvorenju, Bože, tvemu
Po putu hodit pravemu,
K tebi Bogu dojtí svemu!

Dojdi o Bog Duh Stvoritelj,
Čistih srdec ti ljubitelj:
Vse nečisto dej odstrani,
Vu nama se dej nastani,
Srce naše ti premieni.

Ravnaj sveto govorenje,
Kriepi srdca i čutenje:
Dej nam živo veruvati,
Vu te tvrdno se ufati,
Tebe ljubít', vuživati!

Mudrost, razum, svetovanje,
Dej pobožnost, jakost, znanje,
Strah nam vsake dej grehote,
I tak z darmi tve dobrote
Razveseli nas sirote!

Hodi, o Duh, da spoznamo
Kriepost tvoju i pevamo:
Z Otcem, Sinem prevelika
Od vsakoga naj jezika
Budi tebi naviek dika. Amen.

PSALMODIJA VEČERNICE:

Psalms 102 (103)

PRIPEV:

Hvali duša moja, hvali duša moja, Gospona, Gospona!

Hvali Gospona, moja duša,*
i vse kaj je v meni njegvo sveto ime.

Hvali Gospona, moja duša,*
i ne spozabi vseh njegovih dobročinstvih! *PRIPEV...*

On tebi odpušča vse tvoje pregreške,*
on ozdravlja vse tvoje mlahavosti.

On tvoje želje napunjuje s dobrotami,*
da se tvoja mladost ponovi kakti orla. *PRIPEV...*

Milostiven i milosrden je Gospon:*
dugotrpljiv i velikoga smilovanja.

On se ne srdi na vieke,*
niti se zmir nenagraža. *PRIPEV...*

On nam ni včinił poleg naših grehov:*
niti nam ni povrnil poleg naših hudobnostih.

Kak se otec smiluje svojoj detci,*
tak se smiluje Gospon onem, koji se njega bojiju. *PRIPEV...*

Ar on zna, iz česa smo stvorjeni:*
on se spomenuje, da smo prah.

Človečji dani jesu kakti trava,*
kak poljski cviet, ravno tak i on povehne. *PRIPEV...*

Dika budi Bogu Otcu i Sinu*
i Duhu Svetomu.

Kak je bila na početku, tak i vezda i vsigdar,*
i na vieke vekov. Amen. *PRIPEV...*

Molimo!

Bože, koi se po griehu bantuješ,
a po pokori milostiven postaješ:
oglej se milostivno na prošnje tebe molečega puka
i bič tvoje srditosti,
kojega smo zaradi naših griehov vriedni,
od nas odvrni.
Po Jezušu Kristušu našem Gosponu. - Amen.

UVODNI DIEL SVETE MEŠE

Mešnik zapopeva:

- SLAVA BOGU NA VISINI.

A mi vsi skup nastavimo popevati

I na zemlji mir veselje, budi poleg Božje volje:

To sad nebo nazveščuje i glas s neba potrjuje.

Dobre volje vsaka duša, grieha naj več ne spokuša,

Temveč fali, diči Boga, ar je poslal Sinka svoga.

Sinka svoga, Boga moga, z Ocem, Duhom jednakoga,

Duhom Svetim prijetoga, od Marije rođenoga.

- Gospon z vami.

- I s tvojim duhom.

Molimo!

Vsemogući viečni Bože,

ti si hotel da se Vuzem otajstveno svetkuje pedeset dan.

Obnovi čudo prvih Duhov

I daj da se razdieljeni narodi po daru Duha Svetuga zjediniju

a različiti jeziki vu iste vere slavu tvojega imena nazvieščaju.

Po Gosponu našem Ježušu Kristušu, Sinu tvojemu,

ki s tobom živi i kraljuje v jedinstvu Duha Svetoga, Bog,

na vse vieke viekov. - Amen.

SLUŽBA RIEČI BOŽJE

1. ČTEJENJE: (*Rim 8, 22-27*)

Čtejenje Pisma svetuga Pavla apoštola k Rimljanom.

Brača!

Znamo da vsako stvorenje zdihava i mučno iščekuje sve do vezda.

Ali ne samo ono neg i mi sami, ki imamo prvinu (naime milost), i mi sami pri sebi zdihavamo čakajući,

da postanemo deca Božja, i da tielo naše bude otkupljeno.
Ar po ufanju smo se spasili.

Ali ufanje, kak moremo videti, nij več ufanje.

Ar gdo kaj vidi, kak se bude još tomu ufal?

A če se vu to ufamo, kaj još ne vidimo, čakamo s strpljenjem.

Isto tak nam pomaže i Duh v našoj slabosti.

Ar ne znamo zakaj da molimo, kak je treba,
neg sam Duh moli za nas z neizrecivim zdihavanjem.

Ali on, ki ispituje srдца, zna, kaj je želja Duha;

ar kako Bog hoče, zagovara svete.

- Rieč Gosponova.
- Bogu fala...

OTPEVNI PSALM:

Psalm 144 (145)

PRIPEV: Blagoslavljal bum naveke ime tvoje!

Budem izvišaval tebe, o Bože, moj Kralj:*
i dičil tvoje ime vekom, i na vieke viekov.
Vsaki dan budem hvalil tebe*
i dičil tvoje ime vekom, i na vieke viekov. *PRIPEV...*

Velik je Gospon, i velike hvale vrieden:*
i njegva velikoča nema konca.
Vsa pokolenja budu hvalila tvoja dela:*
i tvoju mogućnost nazvieščala. *PRIPEV...*

Tvoje kraljevstvo je kraljevstvo vseh viekov:*
i tvoje gospodstvo od pokolenja do pokolenja.
Gospon podiže vse, koji opadaju:*
i osavlja vse prignjene. *PRIPEV...*

Gospon je blizu vsem, koji njega zazavaju;*
vsem koji njega vu istini zazavaju.
On spunjava želje vseh oneh, koji se njega bojiju,*
i poslušā njihove prošnje. *PRIPEV...*

ALELUJA:
(Mt 11, 29ab)

Aleluja, aleluja
Dojdi, Duh Sveti, napuni srdca svojih viernikov,
I vužgi vu nji ogenj svoje ljubavi! Aleluja!

EVANGELIUM:
(Iv 7,37.39)

- Gospon z vami.
- I s duhom tvojim.

† Čtejenje svetoga evangeliuma od Januša.
- Slava tebi, Gospon.

Vu onem vremenu: na zadnji veliki svetek stane Jezuš i zakriči:
„Gdo je žejen, naj dojde k meni!
Naj pije ki veruje vu me!
Kak veli Pismo: Z njega budu tekli potoki žive vode!“
A to je rekel o Duhu kojuga su trebali prijeti oni, ki veruju vu njega.
Za onda pak još nie bil došel Duh Sveti, ar se Jezuš još nie bil proslavil.

- Rieč Gosponova.
- Slava tebi Kristuš.

PRODEČTVO
VERA BOŽJA

Po prodiki mešnik čita apoštolsku veru Božju:

VERUJEM VU BOGA, Otca vsamogućega,
Stvoritelja neba i zemlje.

Vsi potvrđuju popevajući:

Amen, amen, verujem! Amen, amen, Gospone! (2x)

I VU JEZUŠA KRISTUŠA, Sina njegovoga jedinoga,
Gospona našega.

Koji je prijet od Duha Svetoga,
rođen od Device Marije.

Mučen pod Ponciušem Pilatušem,
razpet, vumerl i pokopan.

Stupil je dole na pekle,
tretji dan je gorestal od mrtveh.

Zastupil je na nebesa,
sedi na desnici Otca Boga vsamogućega.
Odonut hoče dojtj sudit žive i mrtve.

Vsi potvrđuju popevajući:

Amen, amen, verujem! Amen, amen, Gospone! (2x)

VERUJEM VU DUHA SVETUGA.

Svetu Cirkvu katoličansku.

Svete obćinstvo.

Grehov odpušćanje.

Tiela gorestanje,

I žitek vekiviećni. Amen.

Vsi potvrđuju popevajući:

Amen, amen, verujem! Amen, amen, Gospone! (2x)

MOLITVA VIERNIKOV

Prosimo te, Gospone, pusti vu nas tvojega Svetoga Duha, da nas i od griehov čisti i od vseh protivnikov brani.

Vsi pnavljamo: Duh Sveti naj presvietli pamet našu!

1. Milosrdni Gospon Bog, povekšaj veru katoličansku, izkorieni pogane i obrni krivoviernike, molimo te:
2. Milosrdni Gospon Bog, blagoslovi papu našega Benedikta, nadbiškupa našega kardinala Josipa, vse mešnike i vse ostale cirkvene službenike, molimo te:
3. Milosrdni Gospon Bog, blagoslovi nas, naše družine, hiže, blago, gospodarstvo i ves imetek naš. Občuvaj nas kuge, gladi, vojske, silneh betegov, nagle i nepripravljene smrti, molimo te:
4. Milosrdni Gospon Bog, prosimo te ponizno: oprosti nam griehne naše, podelji nam milošću pravične pokore, poboljšanje življenja našega i stalnost vu tvojoj svetoj službi, molimo te:
5. Milosrdni Gospon Bog, smiluj se vsem živem za koje mi moramo moliti, a vsem viernem mrtvem daj pokoj vekivečni, molimo te:

Mešnik:

O Bog, komu je vsako srdce otprto i vsaka skrovnost odkrtia, očisti po tvojem Svetom Duhu srca naša od zloga mišljenja da tebe budemo mogli zveršeno i dostojno dičiti.

Po Jezusu Kristušu Gosponu našem.

- Amen.

EVHARISTIJSKA SLUŽBA

PRIKAZANJE ILI ALDUVANJE

Dok mešnik pripravlja svete dare kruha i vina, zbor i ves narod skupa popevaju:

Psalm 112 (113).

PRIPEV: Gospon kraljuje, v' lepotu obliečen!

Hvalite Gospona, vi službeniki:*

hvalite Gosponovo ime.

Gosponovo ime naj bude blagoslovljeno,*

od vezda tja do vieka. *PRIPEV...*

Od sunčenoga ishoda tja do zapada*

naj bude Gosponovo ime hvaljeno.

Gospon je izvišen zverhu vseh narodov:*

i njegva dika je zverhu nebes. *PRIPEV...*

Gdo je tak izvišen*

kak je Gospon naš Bog?

Koi prebiva vu visini,*

pak se vendar na nizka ogleda. *PRIPEV...*

Koi prostoga podiže iz praha,*

i siromaka izvišuje z blata,

da ga posadi vuz poglavare

svojega ljudstva. *PRIPEV...*

Dika budi Bogu Otcu i Sinu*
i Duhu Svetomu.

Kak je bila na početku, tak i vezda i vsigdar,*
i na vieke viekov. Amen. *PRIPEV...*

Na kraju prikazanja ili alduvanja mešnik moli:

Molite, braća i sestre, da moja i vaša žrtva
bude ugodna Bogu Ocu vsamogućemu.

Narod odgovarja:

Naj prime Gospon žrtvu iz tvojih ruk
na falu i slavu svojega imena
i na korist nam i celoj svojoj svetoj Cirkvi.

DAROVNA MOLITVA

Gospon, naj se na ove dare izlije blagoslov tvojega Duha
da vužge v Cirkvi onu svetu ljubav
po koje se bude vsemu svietu otkrila istina,
da si ti spasil ljude po Jezusu Kristušu,
koji s tobu živi i kraljuje na sve vieke viekov.
Amen.

PREDSLOVLJE TROJAČKO

- Gospon z vami.
- I z duhom tvojim.
 - Gore srca.
 - Imamo pri Gosponu.
- Hvalu dajmo Gosponu Bogu našemu.
- Vriedno je i pravično.

Mešnik moli predslavlje trojačko:

Zaistinu je vriedno i pravično, pravo i spasonosno,
da vsigdar i vsigde zafaljujemo tebi, Gospone,
sveti Otec, vsamoguči viečni Bog,
ti si denes dovršil vuzmeno otajstvo.
Viernike si pridružil svojemu Sinu
i dal si im milost posinjenja darom svojega Duha Svetoga.
Te Duh je na početku Cirkve
vsem narodom objavil spoznavanje pravoga Boga
i različite jezike objedinil v priznavanju iste vere.
Zato sviet po cielom krugu zemaljskom kliče pun vuzmene
radosti, a višnje sile i ž njimi angelske vlasti
skup popevaju pesmu tvoje slave, govoreći bez prestanka:

Narod odgovara popevajuč:

Svet, svet, svet, Gospon Bog Sabaot.
Puna su nebesa i zemlja tvoje slave.
Hozana na visine!
Blagoslovljen ki prihđa vu ime Gosponovo.
Hozana na visine!

DRUGA EVHARISTIJSKA MOLITVA:

Mešnik moli:

Zaistinu si svet, Gospone,
zviranjek vsake svetosti.

Tebe zato molimo:

Rosom Duha svoga posveti ove dare,
Da nam postaneju Tielo i † Krv
Gospona našega Jezušā Kristušā.

Gda se je dragovoljno predal na muku,
vzel je kruh, tebi zafalil,
prelomil i dāl vučenikom svojim govoreči:

VZEMITE I JEĐTE OD OVOGA VSI:
OVO JE TIELO MOJE
KOJE BUDE ZA VAS PREDANO.

- Zdravo Tielo Jezuševo, na oltaru posvečeno.

Isto tak po večerji

vzel je i kalež, znovič ti zafalil,
i dāl vučenikom svojim govoreči:

VZEMITE I PIJTE IZ NJEGA VSI:
OVO JE KALEŽ MOJE KRVI
NOVOGA I VIEČNOGA SAVEZA,
KOJA BUDE PRELEJANA ZA VAS I ZA VSE LJUDE
NA OPROŠČENJE GRIEHOV.
OVO ČINITE MENI NA SPOMENEK.

- Zdravo Krvi Jezuševa, na oltaru posvečena.

Mešnik: Skrovnost vere:

- Tebi fala, tebi dika, tebi slava prevelika.
- O Jezuš, budi faljen, na vse vieke vieka. Amen.

Mešnik moli:

Spominjajući se smrti i gorestanja njegovoga,
prinosimo ti, Gospone, kruh života i kalež spasenja,
zahvaljujući kaj si nas včinił vriednim,
da prebivamo pred tobum i tebi služimo.

Ponizno te prosimo da nas,
pričesnike Tielā i Krvi Kristuševe,
Duh Sveti združī vū jedno.

Spomeni se, Gospone, Cirkve svoje širem svieta,
da ju zvršavaš vū ljubavi
skupa z našim papom Benediktom
i našim nadbiškupom Josipom,
z zborom biškupov, z vsem svečenstvom,
ino z vsemi dijakoni
i z onimi, ki su pozvani na službu Matere Cirkve,
i z narodom koga si za se predobil.

Spomeni se i naše brače,
ka snivaju vū ufanju gorestanja,
i vseh, ki su prešli z ovoga svieta vū tvojem smilovanju:
pripeljaj ih k svetlu svojega lica.

Molimo te, smiluj se nam vsem,
da vriedni budemo biti delniki viečnoga života
z blaženom Bogorodicom Devicom Marijom,
z blaženemi apoštoli i z vsemi svetci
ki si živeli vu tvojoj ljubavi,
da te falimo i slavimo
po Jezušu Kristušu, Sinu tvojem.

PO KRISTUŠU I Z KRISTUŠEM I VU KRISTUŠU
JE TEBI, VSAMOGUČI BOG OTEC,
VU JEDINSTVU DUHA SVETUGA
VSAKA ČAST I SLAVA
NA VSE VIEKE VIEKOV.

- Amen.

GOSPONOVA MOLITVA I PRIČEST

- A vezda vsi skup zmolimo onu molitvu
koju nas je navčil naš Gospon Jezuš Kristuš:

Vsi skup moliju:

Otec naš, koi jesi na nebesih:
Sveti se ime tvoje.
Dojdi kraljestvo tvoje.
Budi volja tvoja, kak na nebu tak i na zemlji.
Kruha našega vsakdašnjega daj nam denes.
I odpusti nam duge naše, kak i mi odpuščamo dužnikom
našim.
I ne vpeljaj nas vu skušavanje.
Nego oslobodi nas od zla.

Mešnik moli:

Izbavi nas, molimo te Gospone, od vsega zla,
podelji nam mir vu naše dane,
da budemo s pomočjum tvoje milosrdnosti
i od grieha vsigdar slobodni,
i od vsake smutnje sigurni:
čakajuči blaženo ufanje
i prihajanje Spasitelja našega Jezuš Kristuša.

Narod odgovarja:

Ar tvoje je kraljevstvo i slava i moč na vse vieke.

Mešnik:

Gospon Jezuš Kristuš, ti si rekel svojim apoštolom:
mir vam ostavljam, mir vam svoj dajem:
prosimo te, naj gledeti na naše griehe
nek na veru svoje Cirkve,
ter se udostoj dati joj mir i jedinstvo,
kak je volja tvoja.
Ki živiš i kraljuješ na vse vieke vekov.

- Amen.

- Mir Gosponov naj bude vsigdar z vsemi vami.

- I duhom tvojim.

- Podielite mir jen drugumu!

Vsi skup popevaju:

Jaganjec Božji, koji odjimplješ griehe svieta, smiluj nam se!
Jaganjec Božji, koji odjimplješ griehe svieta, smiluj nam se!
Jaganjec Božji, koji odjimplješ griehe svieta, daruj nam mir!

Metemtoga mešnik tiho moli:

Gospon Jezuš Kristuš,
naj mi primanje tvojega Tiela i Krvi
ne bude na sud i osudu, nek po tvojoj dobroti,
naj mi bude duši i tielu obramba i liek.

Mešnik poziva na svetu pričest:

Evo Jaganjec Božji, evo ki odjimplje griehe svieta.

Vsi skup govoriju:

Gospon, ja niesem vrieden da dojdeš pod moj krov,
nego samo reči jednu rieč i zdrava postane moja duša.

Za vrieme pričesti se popeva:

Duša Kristuševa, posveti me!
Tielo Kristuševo, spasi me!
Krv Kristuševa, napoj me!
Voda iz rebra Kristuševoga, operi me!
Muka Kristuševa, objači me!
O dobri Jezuš, posluhni me!
Med tvoje svete rane postavi me!
Od tebe razlučiti se ne pusti me!
Od zloče neprijatelov brani me!
Na vuri moje smrti zovi me!
K tebi vu nebo primi me!
Da te s tvojemi angeli hvalim
Vezda i na vieke vekov. Amen.

Ljudi popevaju i ovu pesmu:

Ne ostavi nas nigdar,
Blagoslovi nas vsigdar,
Budi z nami vsaki čas,
Jezuš, Spasitelju naš.
Slavno budi ime Jezuš,
Slavno ime Marija.
Ime Jezuš slavno budi,
Slavno ime Marija.

**ZAHVALA ZA PRIČEST:
MARIJINA PESMA**

Antifona:

Dojdi k nam, o Bog Duh Sveti,
Rieč Božju nam dej razmeti:
Dej stvorenju, Bože tvemu
Po putu hodit pravemu,
K tebi Bogu dojtj svemu

PESMA BLAŽENE DEVICE MARIJE

† Moja duša izvišava Gospona.*
i moj duh se raduje vu Bogu, mojemu Spasitelju.
Kajti se je ogledal na poniznost službenice svoje,*
ar nut, od vezda mene blaženu ozoveju vsa pokolenja.
Ar je meni včinił velika dela, koi je mogučen,*
i njegvo ime je sveto.
On je milosrden od pokolenja do pokolenja*
onem, koi ga se bojiju.
Pokazal je mogućnost svoje ruke,*
rastepel je oholne vu misli svojega srđca.
Mogućne je izhitil iz stolice,*
a ponizne je izvisil.
Gladne je nahranil z dobri,*
a bogate je odpustil prazne.
Prijel je Izraela, svojega slugu,*
kak je govoril našem otcem,*
Ar se je spomenul iz svoje milosrdnosti
spram Abrahamu i njegovomu plemenu na vieke.
Dika budi Bogu Otcu i Sinu*
i Duhu Svetomu.
Kak je bila na početku, tak i vezda i vsigdar,*
i na vieke viekov. Amen.

I ponovi se antifona:
Dojdi o Bog Duh Stvoritelj,
Čistih srdec ti ljubitelj:
Vse nečisto dej odstrani,
Vu nama se dej nastani,
Srce naše ti premieni.

MOLITVA PO PRIČESTI:

Molimo!

Gospon, naj nam prijeti dari svete pričesti pomoreju
da vsigdar gorimo z onem Duhem
koga si neizrecivo podelil svojim apoštolom.
Po Kristušu Gosponu našemu.

- Amen.

BLAGOSLOV I OTPUST

Mešnik podeljuje blagoslov.

- Gospon z vami.
- I s duhom tvojim.

-Blagoslovi vas vsemoguči Bog,
Otec i Sin i Duh Sveti.

- Amen.

- Meša je gotova: idite v miru.

- Bogu fala.

PESMA PRED OLTAROM MAJKE BOŽJE:

K suncu prosi vsaka roža

Dragutin Domjanić

K suncu prosi vsaka roža,
K suncu trava vsaka,
Tak i k tebi, Majka Božja,
Srce siromaka.
Milostiva vsakom ti si,
Vse ti vračiš boli,
Odbila još nikog nisi,
Koi za pomoč moli.

Čuj molitve vruče ove,
Draga naša Mati,
Tvoj te vezda narod zove,
Romari Hrvati:
Dobra nam naviek ostani,
Zmoli nam pri Sinu,
Da od vsega zla obrani
Nas i domovinu.

Kajkavska večernica z mešom predočene ovom tiskovinom,
prikazane su kao jedinstveno događanje u programu
manifestacije **"KAJ v Zelini '12"**
posvećene 31. Recitalu suvremenoga kajkavskoga pjesništva
"Dragutin Domjanić" – Sv. Ivan Zelina 2012.

